

UKA 2017/135

16-08-2017

Inatsisartut suleriaasiat § 33 naapertorlugu aalajangiiffigisassatut siunnersuut imaattoq matumuuna saqqummiuppa:

Siunnersuut uunga: Kalaallit Nunatta pigisaannik aningaaserivimmik pilersitsinerup iluaqutissartai aammalu aporfissarisinnaasaasa misissorneqarnissaanik, ilanngullugu pilersitsinerup suut piunasaqaatitariusumaagai, soorlu aningaasartuutissat aammalu sulisussat pillugit Naalakkersuisut peqquneqassasut inatsisartut aalajangiiffigisassaattut siunnersuut.

(Inatsisartunut ilaasortaq, Anthon Frederiksen, Partii Naleraq).

Tungavilersuut:

Ukiorpassuanguulersuni naalakkersuinikkut eqqartorneqartuarpoq, aningaasat ilami aningaasarpasuit nunatsinni annerusumik kaaviiartinnagit sulisinnagillu nunatsinniit avammut aniatinnartakkatta qanoq iliornikkut nunatsinnut iluaqutaanerusumik aqqiivigineqarsinnaanerat.

Qujanartumik manna nunatta namminiiivinnissaa pimoorullugu suliarineqarpoq, tamaattumik Partii Naleqqamiit piffissanngorsoraarput, nunatsinni aningaasaqarnerup nunatsinnut inuinnullu pitsaanerusumik sunniuteqarluarnerusumillu aqqissuunneqarnissaa isumagissallugu.

Maannamummi takusinnaavarput nunatta innuttaasullu aningaasaataasa ingerlanneqarnerat minnerpaamik aningaaserivinnik marlunnik nunatsinni pigineqanngitsunik, taakkununga iluanaarutaalluartumik aqunneqarlutik ingerlanneqartut.

Aamma isumaqarpugut nuna namminiilivikkusuttoq aningaaseriveqarnikkut imminut sullinnissaminik qulakkeerinnittariaqartoq. Takorloorneqarsinnaanngilarmi nuna nammineersoq nunat allamiut aningaaseriviinik isumalluuteqaannassasoq.

Aamma nalunnngilarput maani najugalippassuit aningaaserivinnik nunani allaneersunik, pingaartumik danmarkimiittunik toqqaannartumik atuisuusut, qularnanngitsumik nunarput namminerisaminik aningaaseriveqannginnera aamma peqputaaqataalluni.

Aamma isumaqarpugut, nunarput namminerisaminik aningaaseriveqalerpat, tamanna nunatta aningaasaqarneranut iluaqutaassasoq aammalu aningaasarpassuit nunatsinniit aniatinneqartartut killilersimaarneqarsinnaalissasut.

Taamaammat Partii Naleqqami isumaqarpugut, nunarput namminerisaminik aningaaseriveqalerneratigut, nunatsinni aningaasaqarneq iluaquserneqassasoq aammalu nunatsinniik aningaasat aniatinneqarnerat killilersimaarneqarsinnaanerulissasoq.

Taamaammat siunnersuutigaarput Naalakkersuisut peqquneqassasut qulaani misissuisitsineq taaneqartoq ingerlatissagaat, tungavissaqarluartumillu oqallinnissaq pillugu aamma neriuutingaarput nunatta pigisaanik aningaaserivimmik pilersitsisoqarnissaa aalajangiiffiqarsinnaalerumaartoq.

Pisortatigut aningaasatigut allaffissornikkullu kingunissai:

Misissuititsinermit pisortatigut aningaasartuutissat nalilernerqarput 125-250.000 kr. missiliussagai, tassa sulisorineqartussap $\frac{1}{4}$ -miit $\frac{1}{2}$ -imut ukiumut nalinga. Naalakkersuisut allamik isumaqassagaluarpata tamanna naalakkersuisunit suliap siullermeerneqarnerani akissummi nassuiaateqarfigineqassasoq piumasarissavarput.

Namminersortunut aningaasatigut allaffissornikkullu kingunissai:

Soqanngilaq.

Innuttaasunut aningaasatigut allaffissornikkullu kingunissai:

Soqanngilaq.